

陋巷志

序



陋巷志卷之二

世家志上

敘曰魯地上應奎婁是為圖書之府鍾靈毓秀宣
父挺然篤生為萬世教主復聖接迹而起授受道
統真傳羽儀聖作揚詡地靈豈偶然哉太史公表
顏氏之先始于黃帝雖人代綿邈而嗣續有徵聖
神之胤炳矣自周封顏公為魯附庸子孫遂以為
姓世有顯裔而復聖以布衣興之由是而後世運
遷流崇仰不異幾與孔氏比隆焉然而宗支之派



淵源無竭聞達之興肩踵相藉皆由復聖而作者也嗚呼道脉之無窮天象之有赫詎不信夫作世家志

先師世家

顏氏之先出自黃帝黃帝生昌意昌意生帝高陽帝高陽生稱稱生卷章卷章生吳回吳回生陸終陸終生六子一曰昆吾其國衛也二曰參胡其國韓也三曰彭祖其國徐也四曰會人其國鄭也五曰晏安其國邾也六曰季連其國楚也晏安為曹

姓歷唐虞夏商不能紀其傳周武王克商封其裔孫俠為邾子俠生非非生成成生車輔車輔生將新將新生訾父訾父生夷甫夷甫字伯顏謚武公子友別封邾為小邾子遂以顏為氏以其附庸于魯故世世事魯為卿大夫魯國之族最為蕃衍友生爽為下大夫爽生連連生噉噉生鳴自連至鳴皆魯上大夫鳴生音為司寇音生羽羽生訓訓生簡簡生箱自羽至箱皆下大夫箱生彪彪生景景生整整生恤恤生求自彪至求皆司寇求生友為

邑宰友生無繇字路為魯卿士孔子始教學於闕里而受學焉娶齊姜氏生回字子淵少孔子三十歲孔門達者七十二人顏氏有八回居四科之首天資明睿潛心聖學修博約之訓聞克復之旨及問為邦孔子以四代禮樂告之稱其能守中庸又以用舍行藏惟回可與共故曰顏氏之子其殆庶幾乎顏子簞瓢陋巷不改其樂孔子賢之嘗謂回曰家貧居卑胡不仕乎對曰回有郭外之田五十畝足以給饘粥郭內之田十畝足以為線麻鼓枲足以自娛所學于夫子者足以自樂回不願仕也回願貧如富賤如貴無勇而威與士交通終身無患難亦且可乎孔子曰善哉回也夫貧而如富其知足而無欲也賤而如貴其讓而有禮也無勇而威其恭敬而不失于人也終身無患難其擇言而出之也若回者其至乎孔子北遊于農山子路子貢顏淵侍孔子曰二三子各言爾志吾將擇焉回對曰回聞薰蕕不同器而藏堯桀不共國而治以其類異也回願得明王聖主輔相之敷其五教導

之以禮樂使民城郭不修溝池不越鑄劍戟為農器放牛馬于原藪室家無離曠之憂千歲無戰鬪之患則由無所施其勇而賜無所用其辯矣夫子凜然曰美哉德也子貢抗手而對曰夫子何選焉孔子曰不傷財不害民不繁詞則顏氏之子有矣孔子厄于陳蔡之間仲由有愠言回曰夫子之道至大天下不能容雖然夫子推而行之世不我用有國之醜也夫子何病焉不容然後見君子楚王將以書社地封孔子令尹子西曰王之輔相有如顏回者乎王曰無有子西曰孔丘得據土壤賢弟子為佐非楚之福楚王乃止孔子嘗曰回有君子之道四焉強于行義弱于受諫怵于持祿慎于治身子子貢對衛將軍文子曰夙興夜寐諷誦崇禮行不貳過稱言不苟顏回之行也若逢有德之君世受顯命不失厥名以御于天子則王者之相也回年二十九髮盡白三十二而卒孔子哭之慟曰天喪予矣魯哀公弔馬使人訪于孔子孔子對曰凡在封內皆臣子也禮君弔其臣升自東階向尸而

哭其恩賜之施不有竿也生于昭公二十一年卒于哀公五年墓在魯城東防山之陽娶宋戴氏生

子歆以下詳具世表按孔子年譜周景王十四年即魯昭公二十一年庚辰冬

十一月辛巳朔十六日丙申顏子生少孔子三十歲少伯魚十一歲周敬王二十七年即魯哀公二年戊申是年顏子年二十九髮白又三年辛亥年三十二歲秋八月乙未朔二十三日丁巳顏子卒

葬魯城東防山南

先師集紀

經書

子曰回之為人也擇乎中庸得一善則拳拳服膺

而弗失之矣中庸

子曰吾與回言終日不違如愚退而省其私亦足以發回也不愚

子謂子貢曰女與回也孰愈對曰賜也何敢望回回也聞一以知十賜也聞一以知二子曰弗如也

吾與女弗如也

顏淵季路侍子曰盍各言爾志子路曰願車馬衣輕裘與朋友共敝之而無憾顏淵曰願無伐善無施勞子路曰願聞子之志子曰老者安之朋友信

之少者懷之

哀公問弟子孰為好學孔子對曰有顏回者好學不遷怒不貳過不幸短命死矣今也則亡未聞好學者也

子曰回也其心三月不違仁其餘則日月至焉而已矣

子曰賢哉回也一簞食一瓢飲在陋巷人不堪其憂回也不改其樂賢哉回也

子謂顏淵曰用之則行舍之則藏惟我與爾有是夫

曾子曰以能問於不能以多問於寡有若無實若虛犯而不校昔者吾友嘗從事於斯矣

顏淵喟然嘆曰仰之彌高鑽之彌堅瞻之在前忽焉在後夫子循循然善誘人博我以文約我以禮欲罷不能既竭吾才如有所立卓爾雖欲從之末由也已

子曰語之而不惰者其回也與

子謂顏淵曰惜乎吾見其進也未見其止也

子曰從我於陳蔡者皆不及門也德行顏淵閔子
騫冉伯牛仲弓言語宰我子貢政事冉有季路文
學子游子夏

子曰回也非助我者也於吾言無所不說

季康子問弟子孰為好學孔子對曰有顏回者好
學不幸短命死矣今也則亡

顏淵死顏路請子之車以為之槨子曰才不才亦
各言其子也鯉也死有棺而無槨吾不徒行以為
之槨以吾從大夫之後不可徒行也

顏淵死子曰噫天喪予天喪予

顏淵死子哭之慟從者曰子慟矣曰有慟乎非夫
人之為慟而誰為

顏淵死門人欲厚葬之子曰不可門人厚葬之子
曰回也視予猶父也予不得視猶子也非我也夫
二三子也

子曰回也其庶乎屢空賜不受命而貨殖焉億則
屢中

子畏於匡顏淵後子曰吾以女為死矣曰子在回

何敢死

顏淵問仁子曰克己復禮為仁一日克己復禮天下歸仁焉為仁由己而由人乎哉顏淵曰請問其目子曰非禮勿視非禮勿聽非禮勿言非禮勿動顏淵曰回雖不敏請事斯語矣

顏淵問為邦子曰行夏之時乘殷之輅服周之冕

樂則韶舞放鄭聲遠佞人鄭聲淫佞人殆以上論語

孟子曰禹稷顏回同道禹思天下有溺者由己溺之也稷思天下有饑者由己饑之也是以如是其

急也禹稷顏子易地則皆然

顏淵曰舜何人也予何人也有為者亦若是以上孟子

子曰顏氏之子其殆庶幾乎有不善未嘗不知知之未嘗復行也易曰不遠復無祗悔元吉周易繫辭

顏淵之喪饋祥肉孔子出受之入彈琴而後食之

孔子之喪門人疑所服子貢曰昔者夫子之喪顏

淵若喪子而無服喪子路亦然請喪夫子若喪父

而無服

子路去衛謂顏淵曰何以贈我曰吾聞之也去國

子路去衛謂顏淵曰何以贈我曰吾聞之也去國

子路去衛謂顏淵曰何以贈我曰吾聞之也去國

則哭于墓而後行反其國不哭展墓而入謂子路曰何以處我子路曰吾聞之也過墓則式過祀則

下 以上禮記檀弓

顏回問君子孔子曰愛近仁度近智為己不重為人
不輕君子也夫顏回問小人孔子曰毀人之善以為
辯狡訐懷詐以為智幸人之有過耻學而羞不能
小人也

顏回謂子路曰力猛於德而得其死者鮮矣盍慎
諸焉

叔孫武叔見於顏回武叔多稱人之過而已評論
之顏回曰吾聞諸孔子曰言人之惡非所以美己
言人之枉非所以正己故君子攻其惡無攻人之
惡

楚昭王聘孔子孔子往拜禮焉路出於陳蔡陳蔡
大夫相與謀曰孔子聖賢其所刺譏皆中諸侯之
病若用於楚則陳蔡危矣乃相與發徒兵後圍孔
子於野不得行絕糧七日無道可通藜藿不糝從
者皆病孔子愈慷慨講誦絃歌不衰乃召子路而

問焉曰詩云匪兕匪虎率彼曠野吾道非乎吾奚
為至於此子路愠作色而對曰君子無所困意者
夫子未仁與人之弗吾信也意者夫子未智與人
之弗吾行也且由也聞諸夫子曰為善者天報之
以福為不善者天報之以禍今夫子積德懷義行
之久矣奚居之窮也子曰由未之識也居吾語汝
夫遇不遇者時也賢不肖者才也君子博學深謀
而不遇時者衆也何獨丘哉且芝蘭生於深林不
以無人而不芳君子修道立德不為窮困而改節
為之者人也生死者命也故居下而無憂者則思
不遠處身而常逸者則志不廣庸知其終始乎子
路出召子貢告如子路子貢曰夫子之道至大也
故天下莫能容夫子盍少貶焉子曰賜良農能稼
不必能穡良工能巧不能為順君子能修其道綱
而紀之統而理之不必其能容今爾不修爾道而
求為容賜爾志不廣矣思不遠矣子貢出顏回入
告亦如之顏回曰夫子之道至大天下莫能容雖
然夫子推而行之不容何病不容然後見君子夫

道之不修也是吾醜也夫道既已大修而世不我用是有國者之醜也已無與焉夫子何病哉不容然後見君子孔子欣然而笑曰有是哉顏氏之子使爾多財吾為爾宰

孔子曰自吾有回門人日益親

顏淵問於孔子曰何以為身子曰恭敬忠信而已矣恭則遠於患敬則人愛之忠則和於衆信則人任之勤斯四者可以正國豈特一身者哉

魯定公問於顏回曰子亦聞東野畢之善御乎對曰善則善矣然其馬將必佚公曰何以知之對曰以政知之昔者帝舜工於使民造父巧於使馬舜不窮其民力造父不窮其馬力是以舜無佚民造父無佚馬今東野畢之御也升馬執轡御體正矣步驟馳騁朝履畢矣歷險致遠馬力盡矣然而猶乃策馬不已臣以此知之公曰吾子之言其義大矣願少進乎回曰臣聞之鳥窮則啄獸窮則攫人窮則詐馬窮則佚自古及今未有窮其下而能無危者也

以上孔子家語

顏淵問曰臧文仲武仲孰賢孔子曰武仲賢哉顏
淵曰武仲世稱聖人而身不免于罪是智不足稱
也好言兵討而挫銳於邾是智不足名也文仲其
身雖歿而言不朽惡有未賢孔子曰身歿言立所
以為文仲也然有不仁者三不智者三是則不及
武仲也顏子曰可得聞乎孔子曰下展禽置六關
妾織蒲三不仁設虛器縱逆祀祀爰居三不智武
仲在齊齊將有禍不受其田以避其難是智之難
也有臧武仲之智而不容于魯抑有由焉作而不
順施而不恕也夫夏書曰念茲在茲順事恕施也
顏子曰小人之言有同乎君子者不可不察也孔
子曰君子以行言小人以舌言君子於為義之上
相疾也退而相愛小人以為亂之上相愛也退而
相惡

顏子問朋友之際如何孔子曰君子之于朋友也
心必有非焉而弗能謂吾不知其仁人也不忘义
德不思义怨仁矣夫

顏子謂子貢曰吾聞諸夫子身不用禮而望禮于

隱者志 卷之二 三
人身不用德而望德于人亂也夫子之言不可不思也以上孔子大訓

孔子適衛衛使見客客去顏淵問曰客仁也乎子曰恨兮其心顏兮其口仁即吾不知也顏淵蹙然變色曰良玉度尺雖有十仞之土不能掩其光良珠度寸雖有百仞之水不能掩其氣夫形體之包心也閔閔乎其薄也苟有溫瑩良在其中則眉睫見之矣疵瑕在其中亦不能匿也詩曰鼓鍾于宮聲聞于外言有諸中者必形諸外也

顏淵問仲尼曰成人之行何若子曰成人之形達乎性情之理通乎物類之變知幽明之故睹遊氣之源若此則可謂成人既知天道行身以仁義飭身以禮樂夫仁義禮樂成人之行也窮神知化德之盛也以上孔子集語

子史

顏回問乎仲尼曰吾嘗濟乎觴深之淵矣津人操舟若神吾問焉曰操舟可學邪曰可能游者可教也善游者數能乃若夫没人則未嘗見舟而謾操

之者也吾問焉而不告敢問何謂也仲尼曰譖吾
與着玩其文也久矣而未達其實而固且道與能
遊者可教也輕水也善游者之數能也忘水也乃
若夫沒人之未嘗見舟也而謾操之也彼視淵若
陵視舟之覆猶其車却也覆却萬物方陳乎前而
不得入其舍惡往而不暇以尾樞者巧以鉤樞者
憚以黃金樞者惰巧一也而有所矜則重外也凡
重外者拱內

仲尼閒居子貢入侍而有憂色子貢不敢問出告
顏回顏回援琴而歌孔子聞之果召回入問曰若
奚獨樂回曰夫子奚獨憂孔子曰先言爾志曰吾
昔聞之夫子曰樂天知命故不憂回所以樂也孔
子愀然有間曰有是言哉汝之意失矣此吾昔日
之言爾請以今言為正也汝徒知樂天知命之無
憂未知樂天知命有憂之大也今告若其實修一
身任窮達知去來之非我亡變亂於心慮爾之所
謂樂天知命之無憂也曩吾修詩書正禮樂將以
治天下遺來世非但修一身治魯國而已而魯之

君臣日失其序仁義益衰情性益薄此道不行一國與當年其如天下與來世矣吾始知詩書禮樂無救於治亂而未知所以革之之方此樂天知命者之所憂雖然吾得之矣夫樂而知者非古人之所謂樂知也無樂無知是真樂真知故無所不樂無所不知無所不憂無所不為詩書禮樂何棄之有革之何為顏回北面拜手曰回亦得之矣出告子貢子貢茫然自失歸家淫思七日不寢不食以至骨立顏回重往喻之乃反丘門弦歌誦書終身不輟

子夏問孔子曰顏回之為人奚若子曰回之仁賢於丘也曰子貢之為人奚若子曰由之勇賢於丘也曰子路之為人奚若子曰師之莊賢於丘也子夏避席而問曰然則四子者何為事夫子曰居吾與汝夫回能仁而不能反賜能辯而不能訥由能勇而不能怯師能莊而不能同兼四子之有以易吾吾弗許也此其所以事吾而不貳也

以上列子

顏回曰回益矣仲尼曰何謂也曰回忘仁義矣曰可矣猶未也它日復見曰回益矣曰何謂也曰回忘禮樂矣曰可矣猶未也它日復見曰回益矣曰何謂也曰回坐忘矣仲尼蹙然曰何謂坐忘顏回曰墮肢體黜聰明離形去知同於大通此謂坐忘仲尼曰同則無好也化則無常也而果其賢乎丘也請從而後也

顏淵東之齊孔子有憂色子貢下席而問之曰小子敢問回東之齊夫子有憂色何邪孔子曰善哉女問昔者管子有言丘甚善之曰褚小者不可以懷大綆短者不可以汲深夫若是者以為命有所成而形有所適也夫不可損益吾恐回與齊侯言堯舜黃帝之道而重以燧人神農之言彼將內求於已而不得不得則惑人惑則死且女獨不聞邪昔者海鳥止於魯郊魯侯御而觴之于廟奏九韶以為樂具太牢以為膳鳥乃眩視憂悲不敢食一嚙不敢飲一杯三日而死此以已養養鳥也非以鳥養養鳥也故先聖不一其能不同其事名止於

實義設於適是之謂條達而福持

孔子窮於陳蔡之間七日不火食左據槁木右擊

槁枝而歌焱氏之風有其具而無其數有其聲而

無宮角木聲與人聲犁然有當於人之心顏回端

拱還目而窺之仲尼恐其廣已而造大也愛已而

造哀也曰回無受天損易無受人益難無始而非

卒也人與天一也夫今之歌者其誰乎回曰敢問

無受天損易仲尼曰饑渴寒暑窮極不行天地之

行也運物之泄也言與偕之偕之謂也為人臣者

不敢去之執臣之道猶若是而况乎所以待天乎

何謂無受人益難仲尼曰始用四達爵祿並至而

不窮物之所利乃非已也吾命有在外者也君子

不為盜賢人不為竊吾若取之何哉何謂無始而

非卒仲尼曰化其萬物而不知其禪之者焉知其

所終焉知其所始正而待之而已耳何謂人與天

一邪仲尼曰有人天也有天亦天也人之不能有

天性也聖人晏然體逝而終矣

顏淵問於仲尼曰夫子步亦步夫子趨亦趨夫子

馳亦馳夫子奔逸絕塵而回瞠若乎後矣夫子曰
回何謂邪曰夫子步亦步也夫子言亦言也夫子
趨亦趨也夫子辯亦辯也夫子馳亦馳也夫子言
道回亦言道也及奔逸絕塵而回瞠若乎後者夫
子不言而信不比而周無器而民滔乎前而不知
所以然而已矣仲尼曰惡可不察與夫哀莫大於
心死而人死亦次之日出東方而入於西極萬物
莫不比方有目有趾者待是而後成功是出則存
是入則亡萬物亦然有待也而死有待也而生吾
一受其成形而不化以待盡效物而動日夜無隙
而不知其所終薰然其成形知命不能規乎其前
丘以是日徂吾終身與女交一臂而失之可不哀
與女殆著乎吾所以著也彼已盡矣而女求之以
為有是求馬於唐肆也吾服女也甚忘女服吾也
亦甚忘雖然女奚患焉雖忘乎故吾吾有不忘者
存

顏回問乎仲尼曰回嘗聞諸夫子曰無有所將無
有所迎回敢問其遊仲尼曰古之人外化而內不

化今之人內化而外不化與物者一不化者也安
化安不化安與之相靡必與之莫多稀韋氏之圃
黃帝之圃有虞氏之宮湯武之室君子之人若儒
墨者師故以是非相整也而况今之人乎聖人處
物不傷物不傷物者物亦不能傷也唯無所傷者
為能與人相將迎

顏回見仲尼請行曰奚之將之衛曰奚為焉曰回
聞衛君其年壯其行獨輕用其國而不見其過輕
用民死死者以國量乎澤若蕉民其無如矣回嘗
聞之夫子曰治國去之亂國就之醫門多疾願以
所聞思其則庶幾其國有瘳乎仲尼曰噫若殆往
而形耳夫道不欲雜雜則多多則擾擾則憂憂而
不救古之至人先存諸已而後存諸人所存於已
者未定何暇至於暴人之所行雖然若必有以也
嘗以語我來顏回曰端而虛勉而一則可乎曰惡
惡可夫以陽為克孔揚采色不定常人之所不違
因案人之所感以求容與其心名之曰日漸之德
不成而況大德乎將執而不化外合而內不訾其

庸詎可乎然則我內直而外曲成而上比內直者與天為徒外曲者與人之為徒也成而上比者與古為徒其言雖教誦之實也古之有也非吾有也若然者雖直不為病是之謂與古為徒若是則可乎仲尼曰惡惡可大多政法而不謀雖固亦無罪雖然止是矣夫胡可以及化猶師心者也顏回曰吾無以進矣敢問其方仲尼曰齋吾將語若有而為之其易邪易之者皞天不冝顏回曰回之家貧唯不飲酒不茹葷者數月矣若此則可以為齋乎

曰是祭祀之齋非心齋也回曰敢問心齋仲尼曰若一志無聽之以耳而聽之以心無聽之以心而聽之以氣聽止於耳心止於符氣也者虛而待物者也唯道集虛虛者心齋也顏回曰回之未始得使實自回也得使之也未始有回也可謂虛乎夫子曰盡矣吾語若若能入遊其樊而無感其名入則鳴不入則止無門無毒一宅而寓於不得已則幾矣

以上莊子

子路入子曰由知者若何仁者若何子路對曰知

者使人知己仁者使人愛己子曰可謂士矣子貢
入子曰賜知者若何仁者若何子貢對曰知者知
人仁者愛人子曰可謂士君子矣顏淵入子曰回
知者若何仁者若何顏淵對曰知者自知仁者自
愛子曰可謂明君子矣 荀子
孔子習周公者也顏淵習孔子者也拜逢蒙分其
弓良捨其策般投其斧而習諸孰曰非也或曰此
名也彼名也處一馬而已矣曰川有瀆山有嶽高
而且大者衆人所不能踰也

或問世言鑄金金可鑄歟曰吾聞覲君子者問鑄
人不問鑄金或曰人可鑄歟曰孔子鑄顏淵矣或
人歟爾曰盲哉問鑄金得鑄人

晞驥之馬亦驥之乘也晞顏之人亦顏之徒也或
曰顏徒易乎晞之則是曰昔顏常晞夫子矣正考
甫常晞尹吉甫矣公子奚斯常晞正考甫矣如不
欲晞則已矣如欲晞孰禦焉

或曰使我紆朱懷金其樂不可量也曰紆朱懷金
之樂不如顏氏子之樂顏氏子之樂也內紆朱懷

金之樂也外或曰請問屢空之內曰顏不孔雖得天下不足以為樂然亦有苦乎曰顏苦孔之卓也或人瞿然曰茲苦也祇其所以為樂也歟

曰有教立道無心仲尼有學術業無心顏淵或曰立道仲尼不可為思矣術業顏淵不可為力矣曰未之思也孰禦焉

或曰猗頓之富以為孝不亦至乎顏其餒矣曰彼以其粗顏以其精彼以其回顏以其貞顏其劣乎顏其劣乎

山雌之肥其意得乎或曰回之簞瓢臞如之何曰明明在上百官牛羊亦山雌也閭閻在上簞瓢粹茹亦山雌也何其臞千鈞之輕烏獲力也簞瓢之樂顏氏德也

敢問潛心于聖曰昔仲尼潛心於文王矣達之顏淵亦潛心於仲尼矣未達一間耳神在所潛而已矣

或問淵騫之徒惡乎在曰寢或曰淵騫曷不寢曰攀龍鱗附鳳翼巽以揚之勃勃乎其不可及乎如

其寢如其寢

或曰子於天下則誰與曰與夫進者乎夫進也者進於道慕於德殷之以仁義進而進退而退日孳孳而不知勸者也或曰進退則聞命矣請問退進曰昔者顏淵以退為進天下鮮儷焉或問若此則何小於必退也曰必進易儷也必退易儷也進以禮退以義難儷也

以上揚子法言

孔子窮于陳蔡之間藜羹不斟七日不嘗粒晝寢顏回索米得而爨之幾熟孔子望見顏回攬其甑

中而食之選間食熟謁孔子而進食孔子佯為不見之孔子起曰今者夢見先君食潔而後饋顏回對曰不可嚮者煤室入甑中棄食不祥回攫而飯之孔子歎曰所信者目也而目猶不可信所恃者心也而心猶不足恃弟子記之知人固不易矣

春秋

孔子遊於景山之上子路子貢顏淵從孔子曰君子登高必賦小子願言者何其願丘將啓汝子路曰由願奮長戟盪三軍乳虎在後仇敵在前蠡躍

蛟奮進救兩國之患孔子曰勇士哉子貢曰兩國
構難壯士列陣塵埃漲天賜不持一尺之兵一斗
之糧解兩國之難用賜者存不用賜者亡孔子曰
辯士哉顏回不願孔子曰回何不願顏回曰二子
已願故不敢願孔子曰不同意各有事焉回其願
丘將啓汝顏淵曰願得小國而相之主以道制臣
以德化君臣同心外內相應列國諸侯莫不從義
嚮風壯者趨而進老者扶而至教行乎百姓德施
乎四蠻莫不釋兵輻輳乎四門天下咸獲永寧鎭
飛蠕動各樂其性進賢使能各任其事於是君綏
于上臣和于下垂拱無為動作中道從容得禮言
仁義者賞言戰鬪者死則由何進而救賜何難之
解孔子曰聖士哉大人出小人匿聖者起賢者伏
回與執政則由賜焉施其能哉

子路曰人善我我亦善之人不善我我不善之子
貢曰人善我我亦善之人不善我我則引之進退
而已耳顏回曰人善我我亦善之人不善我我亦
善之三子所持各異問於夫子夫子曰由之所言

陋巷志 卷之二
蠻貊之言也賜之所言朋友之言也回之所言親屬之言也

孔子與子貢子路顏淵游於戎山之上孔子喟然嘆曰二三子各言爾志予將覽焉由爾何如對曰得白羽如月赤羽如朱擊鐘鼓者上聞於天下槩於地使將而攻之惟由為能孔子曰勇士哉賜爾何如對曰得素衣縞冠使於兩國之間不持尺寸之兵升斗之糧使兩國相親如弟兄孔子曰辯士哉回爾何如對曰鮑魚不與蘭茝同筍而藏桀紂

不與堯舜同時而治二子已言回何言哉孔子曰回有鄙之心顏淵曰願得明王聖主為之相使城郭不治溝池不鑿陰陽和調家給人足鑄庫兵以為農器孔子曰大士哉由來區區汝何攻賜來便便汝何使願得之冠為子宰焉

以上韓詩外傳

縣子問子思曰顏回問為邦夫子曰行夏之時若是殷周異正為非乎子思曰夏數得天堯舜之所同也殷周之王征伐革命以應乎天因改正朔若云天時之改耳故不相因也夫受禪於人者則襲

其統受命於天者則革之所以神其事如天道之變然也三統之義夏得其正是以夫子云孔叢子顏淵死子曰天喪予子路死子曰天祝予孔子自傷之辭非實然之道也孔子命不王二子壽不長也不王不長所稟不同度數並放適相應也

顏淵與孔子俱上魯泰山上孔子東南望吳閭門外有繫白馬引顏回指以示之曰若見吳閭門乎顏淵曰見之孔子曰門外何有曰有如繫練之狀孔子撫其目而止之因與俱下下而顏淵髮白齒

落遂以病死

顏淵曰舜何人也予何人也五帝三王顏淵獨慕舜者知己步騶有同也知德所慕默識所追同一實也以上王克論衡

伯夷傳曰七十子之徒仲尼獨薦顏淵為好學然回也屢空糟糠不厭卒天死天之報施善人如何哉伯夷叔齊雖賢得夫子而名益彰顏淵雖好學附驥尾而名益顯史記

人或問孔子曰顏回何如人也曰仁人也丘弗如

也子貢何如人也曰辯人也丘弗如也子路何如人也曰勇人也丘弗如也賓曰三人皆賢賢而為夫子役何也孔子曰丘能仁且忍辯且訥勇且怯以三子之能易丘一道丘弗為也孔子知所施之也

淮南子

曾孟獻子聘於晉宣子觴之三徙鍾石之懸不移而具獻子曰富哉家宣子曰子之家孰與我家富獻子曰吾家甚貧惟有二士曰顏回茲無靈者使吾邦家安平百姓和協惟此二者耳吾盡於此矣

客出宣子曰彼君子也以養賢為富我鄙人也以鐘石金玉為富孔子曰孟獻子之富可著於春秋

劉氏新序

顏回將西游問於孔子曰何以為身孔子曰恭敬忠信可以為身恭則免於衆敬則人愛之忠則人與之信則人恃之人所愛人所與人所恃必免於患矣可以臨國家何況於身乎故不比數而比踈不亦遠乎不修中而修外不亦反乎不先慮事臨難乃謀不亦晚乎

孔子晨立堂上聞哭者聲音甚悲孔子援琴而鼓之其音同也孔子出而弟子有吒者問誰也曰回也孔子曰回何為而吒回曰今者有哭者其音甚悲非獨哭死又哭生離者孔子曰何以知之回曰似完山之鳥孔子曰何如回曰完山之鳥生四子羽翼已成乃離四海哀鳴送之為是往而不復返也孔子使人問哭者哭者曰父死家貧賣子以葬之將與其別也孔子曰善哉聖人也

以上劉氏說

周文王胥附奔轅先後禦侮謂之四隣以免乎牖里之害懿子曰夫子亦有四隣乎孔子曰吾有四友焉自吾得回也門人加親是非胥附乎自吾得賜也遠方之士日至是非奔轅乎自吾得師也前有光後有輝是非先後乎自吾得由也惡言不至於門是非禦侮乎

尚書大傳

周子曰伊尹顏淵大賢也伊尹耻其君不為堯舜一夫不得其所若撻于市顏子不遷怒不貳過三月不違仁志伊尹之所志學顏子之所學顏子一簞食一瓢飲在陋巷人不堪其憂而不改

陋巷志 卷之二
其樂夫富貴人所憂也顏子不憂不求而樂乎貧者獨何心哉天地間有至富至貴可愛可求而異乎彼者見其大而忘其小焉爾見大則心泰心泰則無不足無不足則富貴貧賤處之一也處之一則能化而齊故顏子亞聖

子曰予欲無言天何言哉四時行焉百物生焉然則聖人之蘊微顏子殆不可見發聖人之蘊教萬世無窮者顏子也聖同天不亦深乎

張橫渠曰顏子龍德而隱故遁世不見知而不悔與聖者同

程明道曰昔受學于周茂叔每令尋仲尼顏子樂處所樂何事

仲尼元氣也顏子春生也孟子并秋殺盡也仲尼無所不包顏子示不違如愚之學于後世有自然之和氣不言而化者也孟子則露其才蓋亦時焉而已仲尼天地也顏子和風慶雲也孟子泰山巖巖之氣象也觀其言皆可以見之矣仲尼無迹顏氏微有迹孟子其迹著

顏子所言不及孔子無伐善無施勞是顏子性分
上事孔子言安之信之懷之是天理上事

程伊川曰凡學之道正其心養其性而已中正而
誠則聖矣君子之學必先知明諸心知所往然後力
行以求其至所謂自明而誠也顏子所事曰非禮
勿視非禮勿聽非禮勿言非禮勿動仲尼稱之則
曰得一善則拳拳服膺而弗失之矣又曰不遷怒
不貳過有不善未嘗不知知之未嘗復行也此其
好之篤學之之道也視聽言動皆禮也所異于聖

人者聖人不思而得不勉而中從容中道顏子則
必思而後得必勉而後中

以上性理

雜說

老子見孔子從弟子五人問曰前為誰一曰子路
勇而多力其次子貢為智曾子為孝顏回為仁子
張為武老子嘆曰吾聞南方有鳥名為鳳所居積
石千里天為生食其樹名瓊枝高百仞以璆琳琅
玕為實天又為生離珠二人三頭遮起以伺琅玕
鳳鳥文戴聖嬰仁左智右賢

太平御覽

仲尼為素王顏淵為司徒

論語摘輔象

孔子嘗使子貢往來而又未返謂弟子兆之遇昂
皆言無一足不來顏子掩口而笑孔子曰回笑是
謂賜必來也因問曰何以知賜來對曰無足者蓋
乘舟而來賜且至矣清朝也明旦子貢果乘舟朝
至

顏淵子路共坐於門有鬼魅求見孔子其目若日
其形甚偉子路失魄口禁顏淵納屐拔劍而前捲
至其腰於是化為蛇遂斬之孔子出觀嘆曰勇者
不懼知者不惑仁者有勇勇者不必有仁

子路顏淵浴於洙水見五色鳥顏回問子路此為
何鳥子路曰榮榮之鳥後日顏回與子路又浴於
泗水更見前鳥復問由識此鳥否子路曰識回曰
何鳥子路曰同同之鳥顏回曰何一鳥而二名子
路曰譬如絲如絹煮之則為帛染之則為皂不亦
宜乎

以上衝波論

孔子使顏淵執轡到匡郭外顏淵舉策指匡穿垣
曰往與陽虎正從此入匡人聞其言孔子貌似陽

虎告匡君曰往者陽虎今復來至乃令桓魋圍孔子數日不解弟子皆有饑色於是孔子仰天而歎曰君子固亦窮乎子路聞孔子之言悲感勃然大怒張目奮劍聲如鐘鼓顧謂二三子曰使吾有此厄也孔子曰由來今汝欲聞名為戮我於天下為汝悲歌而感之汝皆和我由等唯唯孔子乃引棊而歌音曲甚哀有暴風擊拒軍士偃仆於是匡人乃知孔子聖人瓦解而去


路史

孔子昧旦晨興顏回侍側聞哭者之聲甚哀曰哭聲非但為死者而已又有生離別者也子曰何以知之對曰回聞昔桓山之鳥生四子羽翼已成將分于四海其母悲鳴而送之哀聲有似于此謂其往而不返也回竊以音類知之夫子使人問哭者果曰父死家貧賣子以葬與之長訣子曰回也善於識音矣

韓詩外傳

論曰夫復聖之生豈不關世運哉由堯舜湯文至於孔子乘五百之期以開道統見而知之者誰也馬遷氏傳仲尼弟子列之首簡傳諸永永炳如日

星矣然止據魯論數語他無考證不太畧乎故今稽諸傳記概其始卒纂為世家昭示來遠而不敢汎引曲說以紊大體誠嚴之也至乃嘉言懿行散見羣書則別加搜采臚列於後故雖經訓之明著人所習聞子史之寓言經所不載下逮雜家小說事涉傳疑者巨細蕪收不敢佚墜焉誠欲使賢聖之迹布在天壤以翊道統云爾若夫內典仙經假托名號吾教所斥不敢叅也然而掛漏之弊猶或未免不有世之博物君子在乎



四
卷
之
一

卷
之
一

十
三

